

Kerajaan timbang beri yayasan pembangunan dana tambahan
Astro Awani
Ogos 6, 2016
Rahimah Abdullah

SHAH ALAM: Kerajaan sedang mempertimbangkan untuk memberi dana tambahan kepada yayasan pembangunan yang terlibat dalam Bajet 2017, yang akan diumumkan pada Oktober, kata Perdana Menteri Datuk Seri Najib Tun Razak hari ini.

Menurut beliau yang juga Menteri Kewangan, pihaknya telah menerima senarai beberapa yayasan yang memohon untuk menambah dana dan sedang meneliti permintaan tersebut.

"Saya akan lihat (permohonan) yayasan yang lain sewaktu saya menggubal Belanjawan Negara pada bulan Oktober ini.

"Saya akan teliti permohonan anda dalam konteks, termasuk semua yayasan dan dana lain yang telah diwujudkan," katanya semasa berucap pada majlis sambutan ulang tahun kelima Yayasan Usahawan Wanita Cina Malaysia (MCWEF) di Setia Alam di sini hari ini.

Jelasnya, peruntukan tambahan yang akan diumumkan itu nanti juga bergantung kepada keperluan dan kemampuan kerajaan.

Menurut Najib, kerajaan sentiasa menyediakan pelbagai saluran bagi membantu rakyat.

"Kerajaan akan sentiasa mewujudkan saluran sebanyak mungkin untuk membantu rakyat yang berpendapatan rendah," katanya.

Ujarnya, MCWEF adalah antara yayasan yang berjaya menunjukkan disiplin dan komitmen yang tinggi selepas menerima peruntukan disediakan kerajaan bagi membantu mereka yang memerlukan.

"Yayasan ini sebelum ini telah diberikan peruntukan RM30 juta. Saya diberitahu

yayasan ini sangat berdisiplin sehingga pegawainya pun tidak boleh tuntutan (perbelanjaan untuk) perjalanan.

"Ini adalah contoh bagaimana komitednya mereka," katanya.

Najib juga melahirkan penghargaan kepada golongan wanita yang dilihat lebih prihatin dan cepat dalam membuat pembayaran balik pinjaman.

"Wanita ini sangat prihatin. Saya percaya mereka boleh membayar balik kerana wanita sangat bersemangat. Tahniah wanita," katanya lagi.

Najib dalam pada itu memuji komitmen diberikan usahawan wanita yang menerima pinjaman kewangan daripada MCWEF dengan 93 peratus daripada mereka berjaya membayar balik pinjaman kepada yayasan.

Sehubungan itu, beliau mengumumkan kenaikan had pinjaman maksimum MCWEF daripada RM20,000 kepada RM30,000 dan penurunan kadar faedah pinjaman yang ditetapkan daripada lima peratus kepada empat peratus.

"Saya harap wanita-wanita yang menerima pinjaman ini akan menjalankan perniagaan dengan baik, tekun dan mereka akan menjadi penyumbang kepada ekonomi Malaysia," tambahnya.

Sehingga kini, katanya, MCWEF yang ditubuhkan sejak lima tahun lepas dengan dana RM30 juta, berjaya melahirkan 2,300 wanita yang maju dalam perniagaan masing-masing.

Tag: [dana tambahan](#), [yayasan](#), [Najib Tun Razak](#), [Yayasan Usahawan Wanita Cina Malaysia](#)

© 2016 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-malaysia/kerajaan-timbang-beri-yayasan-pembangunan-dana-tambahan-113200>